

MPP perlu bersikap profesional, rasional

9HC(Peng) B15 (29/8/06)

Oleh Syuhada Choo Abdullah

AHLI Majlis Perwakilan Pelajar (MPP) sesi 2006/2007, harus mempamerkan imej profesional, praktikal dan rasional bersesuaian cabaran dan arus perubahan zaman.

Rektor Kolej Universiti Kejuruteraan dan Teknologi Malaysia (Kuktem), Prof Datuk Dr Mohamed Said Mat Lela, berkata dalam konteks ini, zaman konfrontasi dan demonstrasi sudah lama berlalu.

Sambil menegaskan idealisme radikal sepatutnya diganti dengan kematangan fikiran dan tindakan, beliau berkata, pemimpin mahasiswa mesti menghayati falsafah 'keimpinan melalui teladan'.

Katanya, mereka mesti berupaya mempamerkan personaliti, sahsiah, akhlak dan amalan kerja boleh dicontohi pelajar lain.

"Oleh itu, komponen kemahiran insaniah yang kini menjadi agenda utama Kementerian Pengajian Tinggi perlu turut sama didukung dan disokong MPP dengan menerapkan elemennya dalam kegiatan dianjurkan," katanya pada majlis penyerahan watak pelantikan dan angkat sumpah jawatan ahli MPP sesi 2006/2007 Persatuan Pelajar Kuktem di Kuantan, kelmarin.

Berdasarkan analisis keputusan

pilihan raya kampus 21 September lalu, Kuktem satu daripada sembilan institusi pengajian tinggi awam yang menyaksikan barisan proaspirasi mendominasi Kabinet MPP dengan membolot semua 15 kerusi diperuntukkan. Selain itu, 81.01 peratus pelajarnya turun membuang undi.

Mohamed Said berkata, ahli MPP perlu menjadi saluran berkesan kepada mahasiswa melalui pembinaan jalinan komunikasi dan perhubungan baik dengan pihak pengurusan universiti.

Beliau yang sentiasa percaya bahawa setiap masalah pasti ada jalan penyelesaian berkata, diplomasi serta hemah tinggi mesti mengatasi

konfrontasi yang tidak lagi relevan kini.

"Sebaik-baik penyelesaian adalah permuafakatan dicapai di meja rundingan dalam suasana kekeluargaan dan harmoni.

Perkara perlu dibudayakan ialah muzakarah dan forum sihat dan bermanfaat, bukan ucapan, perdebatan tidak berkesudahan atau kata-kata keras, menyinggung perasaan serta tidak berhemah," katanya.

Mohamed Said menaruh harapan tinggi ahli MPP Kuktem sesi ini bukan saja dapat membawa isu dan masalah kebajikan pelajar, malah berupaya mengemukakan cadangan konstruktif serta alternatif penyelesaian terhadap isu berkaitan untuk pertimbangan pengurusan universiti.

Katanya, ia dapat direalisasikan melalui penyediaan kertas kerja khas dengan tatabahasa baik, format serta berstruktur, dilengkapi soal selidik, fakta relevan dan perkaralain yang memperlihatkan profesionalisme, selain kematangan ahli MPP.

"Bersetuju untuk tidak bersetuju ialah suatu perkara amat sukar dilakukan. Namun, MPP sebagai perwakilan mewakili pelajar dan kami pihak pengurusan harus sentiasa berlapang dada serta rasional di meja rundingan," katanya.

FAKTA NOMBOR

**Pilihan Raya Kampus
2006/2007 Kuktem**

15

Kerusi diperuntukkan

81.01%

Pelajar keluar mengundi